

LETTRES <sup>270</sup>  
PATENTES DV

ROY, POVR LA CON-  
<sup>4<sup>e</sup></sup> <sup>8<sup>e</sup></sup> <sup>1617</sup> <sup>26</sup>  
VOCATION DE L'ASSEMBLEE que sa Majesté veut estre  
tenuë, à fin d'y resoudre ce qui  
est necessaire au bien de son  
estat, repos & soulagement de  
ses subjects.



A LYON,  
Par BARTHELEMY ANCELIN,  
& NICOLAS IVLLIERON,  
Imprimeurs ordinaires du Roy.

---

M. DCXVII.  
*Avec Priuilege de sa Majesté.*

570  
PATENTED BY

ROY POWER  
MERRILL

THE NEWBERRY  
LIBRARY  
Case  
F  
39  
326

1617 fsl2



# LETTRES PATENTES

*du Roy, pour la conuocation de l'assemblée que sa Maiesté veut estre tenueë, à fin d'y resoudre ce qui est necessaire au bien de son Estat, repos & soulagement de ses subiects.*



O VIS PAR LA  
GRACE DE DIEU,  
ROY DE FRANCE,  
ET DE NAVARRE.

A tous ceux qui  
ces presentes lettres verront; Sa-  
lut. Si tost qu'il pleut à Dieu, par  
son immense bonté nous deli-  
urer des pernicioeux desseins de

ceux qui trauailloient à estouffer  
nostre authorité dans les ruines  
de nostre Estat : Nous conuertis-  
mes nos premieres pensees à ap-  
païser les mouuemens , que l'ap-  
prehension de la calamité publi-  
que auoit soufleuez parmy nos  
subjects. Cela nous ayant heu-  
reusement reüssi, Nous iettasmes  
les yeux sur la fortune de nos  
voisins affligez ; & considerans  
les troubles où ils estoient, & les  
miseres que la continuation des  
guerres leur deuoit apporter,  
dont le peril encor avec le temps  
eust redondé iusques à nous,  
Nous estimasmes ne pouuoir rien  
plus genereusement entrepren-  
dre que de leur procurer par tou-  
tes



tes sortes d'offices le mesme bien de paix dont nous iouïssions. En quoy Dieu ayant fauorisé nostre entremise, & rendu icelle agreable à tous les Princes interessez, les choses se sont si heureusemēt acheminees, que nous pouuons fort vray-semblablement nous promettre de voir en peu de iours la Chrestienté en vn heureux & asseuré repos, & par ainsi nous demeurerons avec plus de loisir & de commodité, pour tourner tous nos soins à l'entiere restauration de nostre Estat. Mais cōmençans à serieusement nous y employer, Nous en auons recogneu la deprauation si grande, & toutes les parties si estrangemēt

alterees, que la crainte de ne pou-  
voir venir à bout d'un ouurage  
si ardu, Nous auroit sans doute  
demeu de nous y engager plus  
auant pour ceste heure, si les mer-  
ueilles que Dieu a cy deuant  
operé en nous, ne nous eussent  
appris, que ceux qui ont les in-  
tentions droictes, & sont assisiez  
de sa grace, ne doiuent de rien  
desesperer. Redoublans donc par  
ceste consideration nostre coura-  
ge, & recherchans les moyens  
pour aduancer vn si sainct œu-  
re: Nous nous sommes reme-  
morez de ceste grande & celebre  
assemblee des trois Estats de no-  
stre Royaume, laquelle durant  
nostre minorité auoit esté con-  
uoquée

uoquee pour mesme effect, qui toutesfois en auoit esté empesché à l'occasion des troubles suruenus en nostre Royaume, de sorte que tant de conferences, consultations & deliberations faites avec beaucoup de labeurs, de fraiz & despences, n'auoient produit autre fruiet, sinon que les remonstrances, plaintes, & doléances de nos peuples, auoient esté toutes compilees en leurs cahiers, & à nous presentees. Aux responses desquelles nous traual lions soigneusement, & serieusement avec nostre Conseil, lors que nostre voyage de Guyenne, & les mouuemens qui suruindrent, interrompirent nostre dessein:

sein: Tellement qu'il reste le principal, qui est de pourueoir à tant de maux, & desordres, lesquels ayans esté curieusement sondez & descouverts, sont demeurez iusques à present sans remede. Ce que nous auons iugé ne se pou- uoir, ny plus commodément, ny plus solidement faire, que par le Conseil de personnes, la dignité, probité, experiēce, & reputation desquelles persuadast à vn cha- cun, que les resolutions qui au- ront esté prises par leurs aduis n'ont autre but, ny visee, que le bien & salut de nostre Royaume. Nous asseurant apres cela qu'il ne se trouuera nul de nos sub- jects, ny si desnaturé, ny si aueu- glé



glé de sa passion, & de son interest priué, qui cōsiderant ce qu'il doit à sa patrie, & que son salut particulier est enclos dans le public, ne se range volontairement à ce qu'il iugera luy mesme necessaire pour la conseruation de l'Estat. Et pour ce, Nous nous sommes resolu de conuoquer au vingt-cinquiesme du mois de Nouembre prochain pres de nous, du ressort de chacun de nos Parlemens des plus signalez, & capables personnages, soit de l'Eglise, soit de la Noblesse, soit de nos Officiers en tel nombre, que pour estre trop grand, il ne puisse apporter incommodité, ou confusion, n'y pour estre trop pe-

tit, aucun defect, ou manquement, pour par leur aduis pourueoir au cōtenu desdits cahyers, ensemble sur le reiglement de nos Cōseils, ordre, & distributiō de nos finances, reformation des abus qui se trouuent en tous les ordres de nostre Royaume, & generallyment sur tout ce qui se trouuera necessaire & expedient pour le bien & soulagement de nos subjects, & seureté de nostre Estat, honneur & dignité de nostre Couronne, & affermisement de la paix en nostre Royaume. Et à fin que ce sainct ceuure puisse estre encores plus celebre & recommandable, quand on verra que chacun selon le rang plus eminent qu'il tient en nostre

Royaume, y contribuera sa prudence, & son affection. Nous auons pourueu qu'au mesme temps, les Princes, Cardinaux, Ducs & Pairs, & Officiers de nostre Couronne se rendent près de nous, pour entēdre encores leurs aduis, sur ce qui nous sera conseillé & représenté par ladite assemblée : Nous asseurant que ce qui aura esté vne fois estably par de si graues & prudens Conseils, sera puis apres inuiolablement obserué. En quoy, comme nous protestons deuant le Dieu viuāt, que nous n'auons autre but & intention que son honneur & le bien & soulagement de nos subjects : aussi au nom de luy mes-

me, Nous coniurons & obtestons  
ceux que nous conuoquons. Et  
neantmoins par la legitime puis-  
sance qu'il nous a dōnee sur eux:  
Nous leur commandons, & tres-  
expressement enjoignons, que  
sans autre respect, ny considera-  
tion quelconque, crainte ou desir  
de desplaire ou complaire à per-  
sonne, ils nous donnent en toute  
franchise & sincerité, les conseils  
qu'ils iugeront en leur conscien-  
ce, les plus salutaires & conue-  
nables au bien de la chose publi-  
que. A CES CAUSES, & à fin que  
chacun sçache que telle est no-  
stre intention, & que les sou-  
haits, vœus & prieres de tous  
nos peuples attirent sur nous  
l'ayde



l'ayde & faueur de celuy qui seul  
inspire les bons mouuemens , &  
en rend heureux le succez : De  
l'aduis des Princes & autres Sei-  
gneurs de nostre Conseil , Nous  
auons decerné & decernons nos  
presentes lettres de déclaration,  
indiction & conuocation. DON-  
N O N S E N MANDEMENT à nos  
amez & feaux les gens tenans  
nos Cours de Parlemens , ou  
Chambres des vacations , qu'i-  
celles ils facent lire , publier , &  
registrer. VOVLONS aussi tous les  
Prelats , Curez & autres , ayans  
l'administration des Conuents  
& Monasteres de nostre Royau-  
me , estre exortez & aduertis de  
nostre part, à ce que durant ladi-

te assemblée, ils facent faire processions & prieres publiques par toutes leurs Eglises, pour inuoyer l'esprit de Dieu sur nous, implorer sa grace & misericorde, à fin que ce que nous entreprenons puisse reüssir à sa gloire, au salut de nos subjects, & restauration de nostre Estat. CAR tel est nostre plaisir. EN TESMOIN de quoy nous auons faict mettre nostre seel à celsdites presentes. DONNE' à Paris le quatriesme iour d'Octobre, l'an de grace mil six cents dix sept. Et de nostre regne le huietiesme.

*Signé,*

LOVYS.

Et sur le reply par le Roy.

DELOMENIE.

Et seellé du grand seau de cire iaune sur double queue.